

# **Badische Landesbibliothek Karlsruhe**

**Digitale Sammlung der Badischen Landesbibliothek Karlsruhe**

## **Kriegskunst zu Fuß**

**Wallhausen, Johann Jacob**

**[Frankfurt a.M.], 1631**

Das Erste Capitel. Lehret/was Glieder vnd Reyen seyn

[urn:nbn:de:bsz:31-163196](https://nbn-resolving.org/urn:nbn:de:bsz:31-163196)



## Das Ander Theil

deß Ersten Buchs/

Von Abrichtung der Musquetirer in Gliedern  
vnd Reyen zu schießen.

Das Erste Capitel.

Lehret/was Glieder vnd Reyen seyn.



Nach dem du nun die Soldaten in der Musqueten so weit gebracht hast / daß sie dasjenige / so ich dir im ersten Theil gewiesen / vnd angezeigt / wissen oder kennen / so ist dir vnd einem jeglichen Musquetirer nöthig / daß er wisse / wie er sich mit gutem Vortheil vnd Behändigkeit vor seinem Feinde / demselbigen einen Abbruch zu thun / vnd sich selbst mit guter Ordnung zu retrahiren vnd salviren, verhalten könne / dieses zu practiren / nemme in acht nachfolgende Lehren.

Erstlich weise sie / was Glieder vnd Reyen sind / wie ich dir im vierdten Theil zeige / vnd lehre sie / wie sie Gliederweiß / darnach die Glieder stark du sie begehrest / zu fünff / zehen / zwanzig / dreyßig / vierßig / fünffßig stark schießen sollen / Nemlich also / daß alle die Musquetirer ein Glied nach dem andern auff einer Stell vnd Ort ihre Musqueten lossen. Dieses zu thun / nimme erst die Glieder fünff dick / stecke zween Stäbe recht gegen einander vber / also daß so weit die Glieder sind / sie von einander stehen / vnd daß alle die Musquetirer / da das erste Glied geschossen / auch auff derselben Stell schießen / Als fünffßig Musquetirer / nemme fünff in ein Glied / hast zehen Glieder jekund / wann du die Musquetirer fährst / sage zum ersten Glied : Macht euch fertig. So lasse sie die Musqueten von der schulter nehmen vnd fertig machen in aller Maniren vnd Zierlichkeit / wie ich dich gewiesen / da du dann wol achtung auff geben must / daß sie sich in solcher Ordnung müssen verhalten. Wann sie nun bereit / vnd begehrest sie sollen schießen / heisse sie anlegen / in dem du sie nun heist anlegen / so schreiten sie drey Schritt fürter / legen an / vnd schießen. In dem du nun das erste oder förderste glied heissest anlegen / so sage zum andern Glied / macht euch fertig / so bald das erste geschossen / vnd von der Stell abgewichen / so heisse das zweyte Glied anlegen / vnd auff derselben Stell / da das erste Glied geschossen / auch schießen.

Mercke jekunder / daß du sie wol vnterweisest / daß ein jeglich Glied sein Gewehr gleich abnimm / gleich hoch halte / gleich fertig mache / gleich anlege / gleich nebeneinander stehe / gleich einer nach dem andern schieße / vnd so sie geschossen / gleich die Musqueten auffheben vnd widerumb laden. So bald nun das erste Glied geschossen / so vnterweise sie widerumb

widerumb von dem Ort sich wegheben / laden / vnd auff ihre vorige Stelle in guter Ordnung kommen mögen / damit sie dem / nechst hinter ihnen / marschirendem Glied nicht hinderlichen in ihrem anlegen seyen / vnd auch bey zeit in guter Ordnung geschwind auff einander schieffen können / wie angesagt / zu dem du sie dann fleissig halten must / daß sie sich / wie ich gelehret / fertig machen. Lasse den ersten im Glied / so geschossen / es sey dann zur rechten oder zur lincken hand / strax zur seiten hinaus gehen / vnd neben den andern Musquetirern einer hinter dem andern hinunter gehen / da dem ersten die andern strax folgen müssen / vnd also auß ihrem Glied ein Reye machen / welches ich dir weitläufftiger zeigen will / wie du auß einem Glied ein Reye / vnd auß einer Reyen ein Glied machen solst mit einem Wort / lasse als dann das erste Glied hinten anhangen / hinder das letzte Glied / also daß ein jeder widerumb neben seinen Mann vnd auff seine stelle komme / vnd thue dieses mit einem jeglichen Glied eines nach dem andern / bis sie alle geschossen / vnd kanst dieses also fort mit einem Truppen nach dem andern treiben / so lange du es begehrest / oder von nöthen hast.

Mercke dieses Exempel.

Hie siehestu in Numero 1. Figura 1. fünffsig Musquetirer / fünff in einem Glied / machen zehen Glieder / hie da die zwo Fürqueten stehen / stelle zween Befelchshaber / auff derselben Stelle müssen sie alle schieffen / jedunder wann das erste Glied auff die Stelle kompt da Lit. C ist / so sagstu zum 1. Glied: Mache euch fertig / schreite zween Schritt oder zwo Zeit / vñ seyn mit deß fertig bis an B, so sagstu: Lege an / schreitet das 1. Glied bis zu A, leget an vnd scheußt. In dem du nun zum ersten sagest: Lege an / so sagstu zum andern Glied: Mache euch fertig / so das erste Glied geschossen / so gehet der erste im Glied an der lincken seite mit Nu. 1. gezeichnet / von seinem Ort kehret sich lincks omb / vnd gehet neben den andern Musquetirern hinunter / vnd macht auß seinem Glied ein Reye / der zweyte folget ihm / darnach der dritte dem zweyten / dem dritten der vierdte / dem vierdten der fünffte recht hinter einander gehend / so lang bis sie zum letzten Glied kommen / als dann stellet sich der erste in die erste Reye hinter dem letzten Glied / der zweyte / so dem ersten folget / gehet hinter dem ersten vorbey / vnd stellet sich neben den ersten an sein rechte hand / vnd machen also auß dieser Reye / so sie im herunter marschiren gemacht / widerumb ein Glied / stellet sich in die zweyte Reye / der dritte gehet hinter dem zweyten vorbey / vnd stellet sich dem zweyten an sein rechte hand / wie der erste in die dritte Reye / der vierdte gehet den ersten / andern vnd dritten vorbey / stellet sich neben den dritten in die vierdte Reye / der fünffte gehet hinter den ersten / andern / dritten vnd vierdten vorbey / stellet sich neben den vierdten in die fünffte Reye / stehet also dasselbe Glied hinter die andern Glieder in guter Ordnung angehengt. Wie sich nun das erste Glied im anhangen / nach dem es geschossen / verhalten / also thue mit allen Gliedern nach einander.

Jedunder fehrestu eben auff solche Weise mit ihnen / wann sie zur rechten seiten hinunter gehen vnd sich anhangen / nach dem schieffen / besihe diese Figur.

Allhie siehestu vnd zehlest in Numero 2. Figura 1. von der rechten hand die Reyen vnd Glieder / vnd läst den an der rechten hand den ersten seyn / vnd wann sie geschossen / läst sie einer hinter dem andern neben den Musquetirern an der rechten seiten hinunter gehen / vnd hinten widerumb anhangen / wie die Ziffern 1. 2. 3. 4. 5. außweisen / so du dieses einmal innen bist / ist es sehr leichtlichen.

Wie du jedunder mit 50. vnd 5. im Glied dich geübet / also kanstu es mit 100. zehen im Glied oder so viel du in einem Glied begehrest / thun.

Wann du nun dieses gethan hast / von vornen zu mit den Gliedern zu schieffen / so lehre sie auch mit den Gliedern von hinten zuschieffen / welches dir daß sehr zu nutzen kompt bey Gefallen / so du marschirn must / oder getriebe wirst von deine Feind / vnd weichen must / da du aber den Feind mit scharmukirn vnd schieffen gern zu rück haltē woltest / damit er dir nicht einfalle / so thue dieses / ziehe in deiner Ordnung als fort / vnd lasse allzeit das hinter ste Glied Musquetirer sich fertig machen / sich zu rück ombkehren / anlegen vnd schieffen / die andere laß also fort marschiren / vnd so bald das hinterste geschossen / so lasse das nechste vor

§ ihm

ihm auch bereit seyn vmb zuschießen/ so bald nun das erste Glied im schießen/ vnd leiste im marschiren geschossen/ so machet es sich geschwind von seinem Ort/ da es geschossen hinweg/ vnd gibt sich zu einer Seiten zur rechten oder linken hinauf/ macht auß seinem Glied ein Reye/ so bald das erste Glied weg ist/ so kehret sich das ander Glied auch vmb/ leget an vnd scheußt in ebener massen/ wie das erste/ vnd also thun sie allesammen eins nach dem andern/ vnd marschiren also in guter Ordnung fort.

Wann nun die Glieder von hinten zu haben geschossen/ so gehet ein jedes in solcher Ordnung/ wie gewiesen/ neben dem Truppen hinauf geschwind/ halb lauffend/ einer nach dem andern auß den Gliedern Reyen machend/ vnd wann sie vor das erste Glied des marschirenden Truppen kommen/ so stellen sie sich in ebenmäßiger Weise vor das erste Glied/ wie sie sich hinten anhangen. Vnd dieses thue/ so lang du begehrest/ jekunder so du dieses thust mit einem Truppen Musquetirer/ vnd hast Spieße bey dir/ also daß du dich vor dem Einfall der Reuterey vorsehen must/ vnd die Musquetirer an beyden seiten also schießend hast/ so mercke/ daß du mit den Spießsen ein Trit geschwinder/ dann mit den Musquetirern marschiren must/ darumb daß dir von den Musquetirern allzeit ein Glied nach dem andern abgeheth/ also mustu sehen/ dz du im marschiren vornen in Fronte ein Glied mit den Spießsen vor den Musquetirern her frey marschirend habest. Wil dir solches weitläufftiger zeigen im fünfften Theil.

#### Declaratio Exempli.

Hie siehestu in Numero 3. Figura 1. A ist die Fronte oder der Ort/ da die Musquetirer ihr Gesicht hinauf wenden vnd fort marschiren/ B ist das hinterste Glied/ welches sich umbkehret vnd Feuer gibt/ C ist dasselbe erste Glied so geschossen/ vnd längs den Truppen der Musquetirer hinauf laufft auff der rechten seiten in Ordnung einer hinter dem andern/ vnd machen auß ihrem Glied ein Reye/ bis daß sie kommen zum vordersten Glied D, da stellet sich der erste in der Reye in die Ordnung als marschirend vor dem ersten im Glied/ der ander/ so ihm folget/ laufft vor dem ersten vorbey/ vnd stellet sich an die lincke hand/ der dritte gleicher weis folget/ vnd stellet sich dem andern an die lincke seiten/ vnd also fort an der vierde vñ fünffte. Wie du mit dem ersten Glied gethan/ also thue mit alle Gliedern eines nach dem andern/ so lang du schießen wilt. Mercke auch/ in dem du ein jedes Glied von hinten heiffest anlegen/ daß du dem nechsten/ so da folget/ sagest: Machet euch bereit/ Als in Litera E, Damit so das eine geschossen/ das andere allzeit fertig sey vmb zu schießen/ siehe auch zu/ daß sie gleich anlegen/ gleich schießen/ gleich abziehen/ damit dir kein Vnordnung erfolge.

Gleich wie du auff der rechten seiten die Musquetirer von hinten zu/ wann sie geschossen vor die vörderste bringest/ also führe sie auch auff der linken seiten hinauf/ damit sie solches gewohnet werden/ dann es dir zu weiterer Behändigkeit dienen wirt/ wie ich dich dessen berichten vnd verständigen will.

Das